

四庫全書

集部

欽定四庫全書

集部

存研樓文集卷十三

詳校官中書臣陸 湘

助教臣常循覆勘

總校官知縣臣繆 琪

校對官中書臣李 荃

謄錄監生臣任楫文

欽定四庫全書

存研樓文集卷十三

編修儲大文撰

傳

沮授傳

沮授廣平人少有大志多權畧仕州別駕舉茂才歷二
縣令又為韓馥別駕表拜騎都尉獻帝初平二年秋七
月馥避位讓表紹紹領冀州牧辟授從事授說紹曰將

軍忠義奮發董卓懷怖濟河而北渤海稽首今振一郡之卒撮冀州之衆威振河朔名播海內若舉軍東向則青州可定還討黑山則張燕可滅回衆北首則公孫必喪震脅戎狄則匈奴必從橫大河之北合四州之地收英雄之才擁百萬之衆迎大駕於西京復宗廟於洛邑號令天下以討未服比及數年大功可立紹喜曰此吾心也即表為監軍奮威將軍紹與呂布破張燕與曹操東擊高唐平原發干破昭烈帝單經陶謙走青州刺史

田楷遂大破公孫瓚於界橋斬瓚所署冀州刺史嚴綱
又破斬黑山賊于毒及長安所署冀州牧壺壽擊斬左
髮丈八等屠劉石青牛角黃龍左校郭大賢李大目于
氏根等屯壁遂定屯鄴授監統內外董督軍府胥有力
馬興平二年獻帝東遷幸安邑授說紹曰將軍累葉輔
弼世濟忠義今州城粗定宜迎大駕安宮鄴都挾天子
而令諸侯畜士馬以討不庭誰能禦之郭圖淳于瓊曰
漢室久衰今欲興之不亦難乎且迎天子以自近動輒

表聞從之則權輕違之則拒命非計之善者也授曰今
迎朝廷大義也又於時宜大計也若不早圖恐為人所
先夫權不失機功在速捷將軍其圖之紹弗能用既而
曹操遣兵西迎帝建安元年還洛陽九月遷都許操收
河南地關中皆附紹悔欲令操徙帝都鄆城以自密近
操拒之四年紹擊破瓚於易京并其衆盡有冀幽并青
之地時遼西烏丸蹋頓助紹破瓚紹承制拜烏丸蹋頓
難樓峭王汗魯王皆為單于收其精騎以益軍用訖如

投策紹欲爭天下令諸子各據一州出長子譚為青州
投諫曰世稱一兔走衢萬人逐之一人獲之貪者悉止
分定故也願上惟先代成敗之戒下思逐兔分定之義
紹不聽授出曰禍其始此乎是時曹操東擒呂布破斬
眭固降河內還軍敖倉阻河為固以拒紹秋八月進軍
黎陽冬張繡降十二月軍官渡紹既忿操挾帝都許又
狙易京之勝乃簡精卒十萬騎萬匹將攻許授與田豐
諫曰師出厯年百姓疲弊宜先遣使獻捷天子務農逸

民若不得通乃表曹氏隔我王路然後進屯黎陽漸營河南益作舟船善治器械分遣精騎鈔其邊鄙令彼不得安我取其逸三年之中事可坐定也審配郭圖曰以明公之神武跨河朔之強衆往伐曹氏譬若覆手也授曰恃衆憑強謂之驕兵兵驕者滅曹氏迎天子安宮許都今舉師南向於勢不順且勝負之機不在彊弱曹氏法令既行士卒精練非公孫瓚坐受圍者也今棄萬安之術而倖難成之功竊為公懼之圖等曰天與弗取反

受其咎監軍之計計在持牢而非見時知機之變也紹從之圖等因譖授曰授威震三軍若其浸盛何以制之且御衆於外不宜知內紹性忌聞而疑之乃分監軍為三都督使授及郭圖淳于瓊各典一軍五年春正月操東破昭烈帝於沛還官渡二月紹合三都督之軍而南臨發授會其宗族散資財與之歎曰夫勢在則威無不加勢亡則不保一身哀哉其弟宗曰曹氏士馬不敵兄何懼焉授曰以曹兗州之明畧又挾天子以為資我雖

克公孫衆實疲弊而將驕怙敗亡可待楊雄有言六國
蚩蚩為羸苦姬此之謂也紹進軍黎陽遣郭圖淳于瓊
顏良攻劉延於白馬授諫曰良性促狹雖驍勇不可獨
任紹不聽夏四月操北救白馬良果敗死紹將渡河追
操授又諫曰勝負變化不可不詳今宜留屯延津分兵
官渡若其克獲還迎不晚設其有難衆弗可還紹又弗
從臨濟授歎曰上盈其志下務其功悠悠黃河吾不返
乎遂以疾辭紹恨之乃省其所部兵屬郭圖進壁延津

南使文醜挑戰醜又敗死操還官渡授又說紹曰北兵
數衆而果勁不及南南穀虛少而貨財不及北南利在
於急戰北利在於緩搏宜徐遲久曠以日月紹終不從
進屯陽武秋八月逼官渡操拒之又襲破紹運車冬十
月紹遣淳于瓊等北迎運車授說紹曰宜遣蔣奇別為
支軍於表以斷操之鈔紹復不從操果潛往鈔運車於
故市烏巢屯破斬瓊等紹衆大潰紹與譚單騎退渡河
授不及渡為人所執詣操大呼曰授不降也操與授有

舊逆勞之曰本初無謀不用君計今國家未定當相與
圖之授曰叔父母弟懸命袁氏若蒙公靈速死為福操
歎曰孤早相得天下不足慮也厚待之後謀還袁氏見殺
紹自軍敗發病歐血七年夏五月死少子尚代立果與譚
舉兵相攻授子鵠為尚將守邯鄲九年夏四月操攻拔之
八月鄴破審配死十年春正月南皮破斬郭圖袁氏遂滅
論曰白馬之役紹遣郭圖淳于瓊顏良是時授尚典軍
而不及授然則兵雖未屬圖而紹之棄授也久矣荀彧

策紹諸臣曰田豐剛而犯上許攸貪而不治審配專而無謀逢紀果而自用不及授孔融亦不問授蓋敵國久伺紹疑投而尚未聞豐之械繫也投策畧類豐而無犯上之嫌主敗身執鬱咽就死嗚呼真忠智士哉

長孫全緒傳

長孫全緒太尉無忌七世孫父守貞鴻臚卿長緒代宗初為右金吾衛大將軍史朝義據洛陽帝將以河東朔方回紇兵十餘萬東討召南北軍諸將問計開府儀同

三司管崇嗣曰我得回紇無不勝帝曰未也左金吾大將軍薛景仙曰我若不勝請以勇士二萬摧鋒死賊帝曰壯哉全緒進曰賊若背城戰破之必矣若閉城留死未可取也且回紇短於攻城持久勢且沮我若休士張勢以綴賊使李光弼取陳留李抱玉擣河北先斷其手足然後縱間賊中脅從羣疑則賊可待帝曰善乃命潼關陝戒嚴拜雍王元帥為中軍僕固懷恩回紇左殺為先鋒魚朝恩郭英又殿入自澠池抱玉薄河陽光弼徑

陳留合兵次洛陽馳兵下懷州大敗朝義精騎十萬於
橫水又敗之石榴園老子祠朝義東奔汴訖滅繇全緒
謀也遷羽林將軍吐蕃陷京師副元帥郭子儀至商州
募探賊勢全緒請行以二百騎隸之遣從六軍將張知
節為前鋒營韓公堆擊鼓譙山張旗幟夜叢萬炬以疑
敵敵訖遁遷容管經畧使時容陷於梁牽屯寄治藤梧
全緒官終寧州刺史子燧慥孫凝刑部尚書

論曰使懷恩頓兵東都城其不為相州之潰者幾希觀

朝義走莫州僕固瑒會回紇諸節度兵追圍四旬不能
拔朝義猶閱精兵欲決死非田承嗣譎還幽州因李懷
仙兵還戰則朝義且閉城堅守而恒州刺史張忠志趙
盧俶定程元勝徐劉如伶相節度使薛嵩暨懷仙承嗣
等同惡翻覆未可知也然則全緒之謀可謂工於審勢
矣而惜其載諸史者鮮故著之

太僕張公傳

唐宋重進士科至明憲孝後而銓格彌以畸重議者謂

科目之不足盡天下才也思欲變通之是故莊烈庚辰特用至二百六十有二人胥授部寺司屬推官知縣號庚辰特用而禮部試殿試其制亦差變是歲石屏太僕張公嘗以丙子雋承宣試至是中禮部試式比殿試莊烈親降金肩輿按視竒公名既而召四十八人於文華殿問今日內外交誼何以禦敵雪恥公策對尤稱旨榜懸國門注二甲第二此所謂白日君王問姓名也時胥竒公遇然而不遂為通州者則異龍三島地遠萬里而

宰執韓城黃縣滑縣時又以棘寺爰立祥特重部臺寺也銓注公禮部儀制主事晉精膳員外郎又晉郎中克勤其官聲振曹司當是時朝臣植黨報復賄賂彌巧密流寇蔓延秦晉豫楚江北獻賊蹂湖南入蜀是故銓樞最急邊才而兵巡之寄特重會叙馬瀘缺兵備道迺命公以副使往公蒞政恕而明革南溪賦役積年弊里耆頌更生雪張當寬獄事詳解網紀畧公勤訓練士繕戎備度形要流寇入界計擒之合江妖寇發設奇計立殄

之事詳珍妖䟽藁比公去而寇衍馬應試余朝宗楊展
所以訖復叙侯天爵高明佐所以訖復瀘遂為督師總
督會駐地馬湖改流郡亦差帖獻賊再攻川南盡遣悍
將相持捷為叙州間不能下訖沉金銀火宮室北走閬
而重慶遵義暨十六營之故壘猶武四鎮十三鎮而錯
峙者實公練卒珍寇遺烈也公特晉太僕寺卿督四川
學兼陝西道監察御史上孤臣遠出戀闕情深䟽陳慎
名器覃實授存大體戒浮言杜異教五事胥允行是時

蜀地什八九亡洪雅獨以反正功團兵董學公獎進士
類激發忠義俾諸生盡法傳元修洪其仁二公以少支
厲於龍鶴山小關山鷄棲嶺青衣江之間蓋川南北二
撫實重倚之而公之憂勤則視金戈鐵鏃彌甚矣越半
載竟卒年裁五十有二洪雅一片土雖謂公涓濱粟里
馬可也時諭祭二壇贈大理寺卿廕一子知州胥如奕
典公少奇慧綜洽四庫書號高才生丙庚行卷嘗饒古
栢山房藁公尤工詩晚年遠顧冀代近顧播蘭恒宵分

雪泣而滇海吾沙踵亂楚雄軼寇石屏邛聚盡焚掠公
才不克展其愴時悼國之志一發之於詩嘗饒止園集
胥傳世公名一甲此策試時之所特問也字退叔號萊
君晚號寧拙其先世籍巴縣元明威將軍均德明初徙
石屏州祖汝橋鄉飲賓一堂五世父煜然分宜訓導以
文行著胥贈如公秩母王淑人子良伍南寧訓導拒偽
命以節著良品良右胥高才生曾孫名漢矣已進士繇
檢討知河南府再雋博學宏詞秩檢討此海內所尊月

榘先生也它胥籍吏禮部玄孫中熊雋承宣試它胥工
文

贊曰張公才望埒楊永寧嚴左衛傳昆明若李中丞胡
承宣王少宰尚應退避而惜其才之訖不克大展也公
策試號竒遇檢討公武之異龍雅埒滇洱而三島英秀
倘有越於點倉鷄足格孤老君之表者乎永寧鴻才冠
輔臣左衛清裁冠冢宰尚庸有埃哉

吳其雷傳

吳其雷字清聞少工文英游士肄藝號荆溪十一子學
僉吳貞啟偕其雷最焉以選士間關楚粵授柱下史之
治書晉知雜務從永明藩繇柳之梧遂入肇慶是時從
李成棟至者曹亦耿獻忠輩氣凌朝士而班列分吳楚
黨楚黨素彭年劉湘客丁時魁蒙正發金堡內主成棟
子元印勢張甚人目為五虎其雷偕邑堵吳二文忠嚴
起恒朱天麟張孝起晏清洪士彭雷得復尹三聘許兆
進等力詆曹耿又偕郭之奇萬翺程源力欣佐吳文忠

觝五虎五虎偕成棟父子訖敗而南寧廣南安龍復龜
菱涉矣後卒於滇不踐跣盟緬廟禍

贊曰陳檢討迦陵截句曰傳聞陽羨吳文學老作天南
句町侯爰書概畧以竢博聞

李文襄公傳

李文襄公之芳號鄴園武定州人順治丁亥進士銓注
金華府推官蒞職五年擢刑部主事晉郎中時六部裁
啟心郎總理十四司覆奏事戊戌遴監察御史乙亥巡

按山西再決季康熙初巡兩浙鹽之芳蒞臺凡十年有
奇封事如慎重票擬甄別督撫嚴覈郡守其要者也庚
戌八月內陞支四品俸仍掌河南道事壬子超擢左副
都御史疏陳文法太密等於東濕緝盜無術累及失主
吏治民生胥病識者韙之冬擢吏部侍郎癸丑夏

命以兵部侍郎總督浙江軍務蒞職裁二月而滇變作
甲寅春請亟增額兵資勦禦匝月閩告變亟檄諸路將
卒分守要害遣副將王廷梅薛受益力堵仙霞關又請

調江南滿漢官兵駐界且發江西重兵守鉛山玉山以壯聲援因會䟽懇給官兵行糧獲允是時賊銳卒聚湖清口五月偕平南將軍賴塔帥滿兵千綠旗兵二千暨募健勇五百亟繇杭趨衢七月賊兵數萬攻衢之芳進擊於坑西飛礮聲震地流丸如雨左右請少避之芳曰今日之事兵勝吾生兵敗吾死將卒迺前奮擊賊始却是時溫處金嚴隸邑胥煽亂之芳招降偽將韓斌王得功擒賊首汪磐繆國英隸郡邑少戢乙卯夏議直搗仙

霞關為摧堅制勝之策議政議令條上進取機宜之芳
言進取之路不在金處而在三衢今逆賊勁卒悉萃於
此此賊一破則諸賊必皆駭亂迸散雖偽將馬九玉朱
懷德等抗拒河西大溪灘而江山常山間有間道可襲
我軍進擊使賊首尾受敵河西孤壘奚能獨完故謂擊
之便時和碩康親王師駐金華力請蒞衢八月合師克
大溪灘復江山縣馬九玉斬別取道奪仙霞關而諸營
業受之芳檄亟據關口夾擊賊將金應虎勢蹙迎降

王師始獲入閩閩平而山谷多餘孽復請江南江西協
勦決歲制以東暨徽饒廣信諸郡胥獲底定晉秩兵部
尚書加正一品之芳復疏言金衢嚴溫處五郡被賊蹂
躪非亟予蠲豁則舊逋既缺新逋復積雖日黜一官奚
益請豁十六年以前額賦獲允詆糜賑飢民冊書一百
二十二萬有奇而陷賊來歸者胥力區畫之流移寔復
之芳以文臣躬擐甲冑大小一百四十戰有奇招降文
武偽官六千二百有奇賊兵一十六萬五千五百有奇

叙錄裁加三級久之追論温州擒斬逆賊暨大溪灘曹平關破賊功迺授拖沙喇哈番襲一次壬戌秋還駐杭冬召為兵部尚書甲子晉吏部時議胥傳捐例注職之芳曰其若大信何議遂定丙寅秋

命以吏部尚書入為文華殿大學士辦機務丁卯春致政歸甲戌冬十一月二日疾卒年七十有三謚文襄

論曰

國朝閣臣獲謚文襄者繇洪南安後至之芳而再見其

金分四角全
卷十三
視明揚桂高諸公勲猷爛著且當度越之矣

中丞潘公傳

中丞潘公名宗洛字書原號巢雲別號垠谷曾祖守正
明萬曆己丑進士工部虞衡司郎中崇祀名宦鄉賢祖
紹顯銓注台州通府父廷選高才生胥贈如公官崇祀
鄉賢母吳太淑人潘氏為宋元樞鄭武惠王系望彭莊
析支吳區號江左甲族公少警慧肄業王谷任先生子
叔祖在陸先生偕計部吳公芥亭上舍陳君次山暨子

伯允素田胥號邑英雋而公允穎出嘗讀史記決月制
義篇章句胥史記同業士驚異雅嗜青浦大樽陳公文
謂河朔少年風流自賞唯大樽先生克當之既而盡緡
有明先正文晰展夕推雖橫逆滄加不少輟而公手搦
管亦雅不屑位置第二流嘗試於句曲振案曰此王守
溪文也曹試士胥驚挹之甲子中承宣司試第一座主
冢宰徐公給諫楊公曰小講扼信好元識也戊辰中禮
部試座主大學士王公大司寇徐公允器之

簡翰林院庶吉士肄

國書辛未二月入見

乾清宮

特命翻清於

保和殿列一等授檢討甲戌請假省母乙亥冬還院丙子
命為陝西正主考盡釐宿弊得雷公御天以下五十有
三人胥秦隴工文士丁丑閏三月奔吳太淑人喪辛巳
還院是時太宗伯掌院學士韓公總裁

政治典訓公與分校昕夕纂輯韓公謂深得史法壬午
賜御書臨米元章帖十一月七日侍直

南書房凡十人

命試蠲甘肅四十二年錢糧上諭公文曉暢懇婉獨當
上指定第一又

命作大書立書恭頌

聖學詩旋

召對西煖閣垂問世系歷官年齒廷臣胥驚企之十二

月十八日

命九卿保舉學臣十九日又

命凡會保八人而韓公特保公

命提督湖廣學政二十三日

召學臣入南書房

御試夫子循循然節經義恭和

御製考試歎詩公復第一翼日內侍首宣公

特賜御書朱子六言詩一幅而其它以次

賜者胥朱子五言詩且五言裁咏一時而六言彙咏四時也癸未正月朔復獲

賜松花江石硯遂以夏四月涖武昌任蓋實埒於撤御前燭書玉堂署之盛事而榮陽潘氏繇左丞騎省太常後其視宋中書舍人良貴元學士昂霄明太常少卿辰雅以文章顯禁掖者才暨遇且胥不翅度越也顧公雖繇詞苑起家而丰裁特稜峭首鈎勒

御製考試歎詩於武昌府學以風勵學宮而附鏡恭和

詩曰惟知感君父寧敢徇私情又著自警箴曰寧破情
面不負朝廷凡竿牘苞直概屏絕䟽劾光化教諭艾某
以警其餘繇是湖南北文武隸學籍數千人無敢以貴
進者楚人士謂百年來所未有雖山陬湖澨胥尊憚之
楚學政滋弊名不揭案而潛附冊者曰附案名沿宿案
而人或至八九易者曰鬼接頭揆它郡邑以就厚貲者
曰飛過海公胥禁絕楚風為一變公覈推文藝漏率強
半雅以李懷麓胡二泉郭明龍郝楚望吳曲蘿李湘洲

愚公石季常鍾退谷譚友夏金子駿曹石霞諸先正為宗
國朝尤尊劉克猶熊鍾陵二先生蒞試里塾輒驚傳曰
某某今果第一矣或又曰曩楚人謂董尚書思白葛太
常此瞻號極明公實過之武公者率無敢易甲乙而歲
癸巳常熟嚴公寶臣主楚試癸卯長洲惠公仲孺主試
公所鑱楚牘標新集中式幾盡此尤以徵黑白蒼素經
義自分而老於文者之所見畧同也公雅善待士漢陽
勞君必達許君之楨黃岡靖君道謨衡陽王君啟宋君

薊齡邵陽景君霍興國成君斌邁嘗入分校胥用賓
主禮邵陽王君元復車君無咎寧鄉張君成善化李君
震胥力延致孝感陳君陞謨才最高而早卒尤痛惜之
而公拔擢士如大學士彭公太常少卿張公等數百人
胥克為當世用公勤護士類不少憚懾黔陽令豐杖士
牒制撫曰儒學非臨民之地公堂非辱士之區如以為
民則不應又有明倫堂之扑責如以為士則不應先有
縣治之扑責令詞屈旋以酷黷黜桂陽郭君遠試弁其

曹者十令憾迂慙假它獄請褫讞之公力持會巡撫趙公亦聞其名迺免而遠亦後舉辛卯試楚人士所尊郭來倩先生也公雅惜天門孝感黃岡武陵諸名邑童子試或至六七千人員限於額嘗題改黃梅中學為大學雲夢桂陽小學為中學比再蒞楚又題改安鄉中學為大學而公識畫尤經遠嘗疏請曰近日大兵所至以亘古未服之紅苗畏威懷德咸願歸誠臣謝遣護卒人後不持寸鐵而未嘗聞犬吠之警有以信

聖世之德威遐暢而亦有以知苗人之非性惡而不可化也惟是永遠綏懷之策既行奮武於前宜即揆文於後請敬陳之大抵生苗之蠢動繇熟苗之勾引為奸而熟苗之不馴繇漢民之膜外異視是故撫苗之法當先施於熟苗必使熟苗之性漸馴而後熟苗可化為民必使熟苗漸化為民而後生苗可化為熟今

皇上視六合如一家蒼生皆赤子奚有漢苗之分生熟之別而事有尚須酌定者即如考試靖州之通道縣分

編伍里一漢四苗各輸租賦而應試者止有漢民壹里夫以歸化百年之久而尚有漢苗之分應試不應試之別漢民指而目之曰苗則苗亦不得不自以為苗此則通道之熟苗可為矜憫者也臣查湖南新化安化兩縣在宋時名為梅山尚係生苗巢穴一歸版圖人文漸盛中進士舉人者每不乏人人不知其為苗彼亦忘乎其為苗矣以彼絜此新化安化之苗何其幸而通道之苗何其不幸其餘各府所隸州縣有熟苗讀書童生因例

不送考往往向臣陳訴是則可為矜憫者又不獨一通道也臣愚謂熟苗之歸化有已歷三十餘年者如願改入漢里即應許以民籍應試漢里生員童生不得阻抑其取額不必加增其卷面不必分別要使漢苗無殊以宏

皇仁無外之義行之既久文教誕敷則熟苗可化為民而生苗可化為熟未必非南楚久安長治之一策也疏上獲

褒旨這本說得是該部確議具奏部議應如學臣請復獲
俞旨而楚苗繇是彌帖伏矣此又公之綜緯荒遐洞貫
樞要匪直以文章競雄也初公蒞楚盡汰部科費亟議
鑄調輒不允最後復以字畫譌錯擿之而

旨仍留故任丙戌入都迎

駕於三山廟蒙

垂問來期公行十步復遣侍衛走騎來視公乘馬訖
迺返翼日入謝

上語內侍曰此即曩草蠲甘肅錢糧諭旨翰林也丁亥選書
淵鑒類涵又編纂

御定子史精華

賜松花江石硯公至是凡獲三賜焉戊子充

日講官起居注四月十五日

御試侍郎以下百六十有三人於澹寧居而題則五畝
之宅十有三句經義也二十一日宣

旨公名復第一是秋

特簡順天正主考官陸燾尤峻得朱公綸以下百九十有
九人胥

京輦畿輔才士公凡三司文衡胥號精鑒而是科繇九
門提督鄂公禮部右侍郎鄧公下百餘人胥克為特宣
力馬已丑三月

特擢詹事府少詹事尋擢內閣學士兼禮部侍郎充
殿試讀卷官庚寅充

經筵講官又總裁

政治典訓掌翰林院掌院學士印公昕夕推譯歲典訓
初集百卷又恪遵子史精華

聖諭逐部歸類每類編事一類中繇子而史而胥斬衷
於精詳典雅歲藁二百卷先晉天文部四卷復薦文解
常熟陶公貞一海寧查公雲標以校勘之此尤儒臣文
章報

國恩之盛事而徐騎省英華楊學士冊府諸書胥匪倫
擬也顧公才暨器識雅可大用而聖主知之尤深辛卯

三月復擢巡撫偏沅等處地方提督軍務兼理糧餉都
察院右副都御史二十六日

陞辭

上諭居官安靜操守寬和暨紅苗軍實諸事二十九日復
賜天閑鞍馬公遂以夏五月蒞長沙任先是巡撫趙公
首釐秕政而間不克根株斷之署篆又亟易賦繇經制
式外耗滋益什之二三又有餽節稱觴費見芹敬諸儀
謝篆謝計諸特獻公胥禁絕而承宣司之加平倉使之

贈耗郡守之季規亦檄准此州縣裁存趙公例耗一分
它胥禁復嚴禁豪右占固牙行利州縣株連訊讞暨里
閉起滅訟者民寔少蘇會商王綱明黨請給開採牌六
月公亟疏題封禁曰戶部咨商人王綱明等稱鉛山不
禁不獨鉛觔易得而鼓鑄亦不遲悞應令其開採臣亦
何容置喙但臣受

恩最厚理應知無不言言無不盡况前受

訓旨首及安靜誠為至言大抵興一利則必生一弊故

治民之道擾之不如安之動之不如靜之也今部議開採有大不便者請詳陳之臣前任學政時考試湖南親身徧歷確見衡郴等處產鉛地方山深谷邃境通黔粵人雜苗獠惟宜安靜不宜擾動今臣復檢查開採禁止根繇蓋自康熙十九年聽民開採彼時輿情皆言貽害非淺督撫乃次第封禁然而奸貪之徒尚有赴部請開者移查屢覆案卷炳存幸賴

聖明洞照於四十二年奉

金史卷之八十三
卷十三
旨聞開礦事情甚無益於地方嗣後有請開採者概不
准行然後奸徒絕想地方寧謐者於今八年皆賴我
皇上特旨之所賜非督撫諸臣之力所能為也今戶部
頓忘

明旨創為聽其開採之說臣不解何故道路喧傳以為
商人浪費庫帑虧欠難完所以矇混戶部借名採取白
鉛以資鼓鑄其實希圖偷竊黑鉛銀礦以飽囊橐夫愚
民何知利之所在身命不顧彼見雇募工價勝於力耕

必將爭趨競赴田畝拋荒正賦漸缺其不便者一山中
多一夫即田中少一農生之者寡食之者衆米價立見
騰貴貧民立見乏食無論湖南之米不能下濟江浙而
境內先不足以自贍倘致失業流離必須多方救濟則
雖商人之虧欠補清終屬得不償失其不便者二深山
封禁有年不無居民廬墓遷徙損傷情殊可憫其不便
者三苗犷生性好利若見土人開採必行劫奪彼此格
鬪必有殺傷文武官弁私貪陋規隱諱重案必釀禍階

其不便者四且開採一節竟有挖未深而砂已盡者如此則必商人之虧欠愈多自顧不暇其招集之衆易聚難散或起盜心或竄苗穴地方自此多事萬一至於興師動衆則軍需糧餉商人能任之乎其不便者五臣忝任封疆若畏首畏尾不敢早言異日一起事端乃為焦頭爛額之舉則身受譴責不足蔽辜誠不得不為未然之過慮也是以不避仇怨密疏入

告伏乞

勅部永行封禁則湖南億萬生靈俱享太平無事之福而臣區區愚忠愚孝之心亦得少安矣蓋山澤之產至宋紹興而已大竭明左都御史軒公輒清操號軒耿提刑浙江請停溫處銀場額課中外胥撓之遂召鄧茂七之亂公清類軒公以卿貳監司守令暨猾胥豪魁所競騫之金穴獨敢觝拄計部且不少憚懾中傷抗疏力爭而中外訖欲撓之而不得此以徵

國家之仁遠榛箒蹊徽而公言業以行雅可亡憾也衡

陽安仁水衝失額田九十三頃有奇公請豁部駁例三分免一公復疏水旱災傷例應開明分數原以未稼被災而田地旋可種植故照被災分數按數蠲免今衡陽安仁田地塘畝實係沙磊崩塌衝決失額田既驟難墾復賦稅從何措辦似不可與田地無損者例論也迺獲豁臨湘水衝田四頃九十畝有奇亦力請豁之又請免墾荒之期俾民益滋墾闢請禁楚民鬻產入川權議捐俸積穀減糶法裁郵遞規例而嚴毀郭氏溺女碑族罰

昆弟競產者蓋至析於衡嶽而毒草絕禱於湖而輒雨
歲屢豐稔民大和會故湘潭河道陳公嘗推論曰潘公
清而和衡陽王君桂陽郭君亦時時稱說之而如以廬
陵之代合肥為口實則又與於陽譽陰構之甚者也公
周覽湖湘嘗特疏曰臣前任學政查湖北府縣衛學六十
十有九額取九百一十四名湖南府州縣衛學七十有
七額取九百九十五名總計湖南進學額數較湖北更
多湖南能文之士較湖北相等祇因中隔洞庭每遇鄉試

正值秋水汪洋之候貧士拮据資斧行至湖濱一遇風濤險阻守候悞期有志之士或至痛哭而返甚有科場期迫念切功名揚帆冒險瞬息而遭覆溺者以致多士畏慮裹足不前其能至武昌入場者十無二三每科中式舉人不及湖北四分之一諸生咸向臣泣訴求請分闈分額臣以江南陝西例却之及任巡撫辛卯鄉試臣亦如前拒絕今

特恩開科士情踴躍咸有上進之心彌切望洋之慮情

願自捐廩糧等項蓋造貢院懇求代題臣思湖南隔越
洞庭實與江南陝西水陸無阻者不同倘憐其跋涉之
艱難鑒其愛戴之真切

特恩破格另差正副考官二員至長沙考試分中楚省
舉人額數之半則不特湖南士子感激高厚而土司紅
苗亦快覩文明矣蓋至後十年而公創議訖行遂與宋
時相賦埒其識慮之經久而不易者若此公經緯兼肆
勤練標兵數月饒嘗

詔偕提督勘邊繇鎮算司城北行二十里至朝陽營出垣入苗地紆折五十里返德勝營翼日輕騎馳四十里陟毛都唐山頂俯瞰黠苗吳老鐵寨麾從騎張左右翼而遣百戶寨長往諭之遂輸誠又巡乾州出入苗界二百里凡上至亭子關下至喜鵲營移營汎邊垣外者一十有八羣苗底定合奏厥功爰碑平苗以永鎮之此又潘金華司馬惠州剎頭婺源源制院思恩山陽僉院青羊山之曩烈也顧公潔已首公盡汰部院費都察院尋

以矜可減等議鐫調賴

聖鑒不允而公蒞職自如且公在湖湘一日則黑鉛終
不可得而服取也繇是媒藥者滋衆而公亦尋以癸巳
歸矣乙未復搆偽券案事尋白而公之所自陳不避讐
怨者誠確也丙申冬請墉工假歸十二月卒年六十公
事親孝通議公暨吳淑人喪胥致毀事兄樵溪公悌慈
兄子承棟如子遇族戚胥有恩意事在陸先生暨知舊
游從克以敬信肄業如長洲徐公葆光泰興朱公青選

陶公查公暨子弟在文等清茗談藝不少勸公嘗獲

賜御製詩集古文淵鑒諸書古文辭上宗史記詩錄玉
溪詩少陵集二十卷而大文今繇其關於館閣臺院之
業者書之它不具著淑人蔣氏曾祖允儀明光熹時任
御史咸寧點將錄所謂八驃騎之一也後拜撫治鄖陽
右僉都御史祖善源籍六館父和鳴籍校母徐孺人淑
人有婦德事吳太淑人尤恪克枋其家用俾公無內顧
憂先公卒年五十有九公誄行曰吾所以能堅絕苞苴

無患得失者繇淑人治家之力衣食麤糲推無藉以一
官為賈販也此尤與曾文定公列女傳序義指符爰附
書子二伯承柱籍六館以勤勤卒於墉工絕仲承權知
山東東平直隸州有政聲孫文照文勲胥蘄克緒彭莊
業者也

謹贊曰公入楚峻陟衡參巔遐眺賦詩蓋太史公浮游
名山巨川之奇氣也其形體清羸而䟽事陳義致極壯
礫逢辰奮庸族談動色紀臣蹟者將不口呿手畫標指

為一代偉人乎哉

太學吳公家傳

吳太學公尚選字公擇歙人明南京戶部侍郎總督糧儲左海公叔子少警敏日誦數千言賓席酬唱未嘗操紙筆口對響應見者爭器之左海公游歷中外為名臣公不以貴公子自驕束僮奴唯謹嘗遊田間有誤擠公仆者僮欲毆之公起曰我自躋爾若何與徐整巾服去明神宗後士大夫最名衍樂歙又璣翠貝布之湊黃山

齊雲皆在封內公故居篁墩南前相湖後弁山日攜飲
酒具召賓徒坐嘯其間尤嗜景純相地法追逐窈絕公
飲酒數斗不亂嘗造觴政引滿曰冒鼓覆樽曰懸磬不
如率罰無貸坐客不勝任多仆者公飲酒自若炯如也
公好音家蓄法部指摘疵誤不爽累黍遇興至則自和
之性又儻蕩嘗夜博輸數千金立盡指囷中米積曰是
可博乎其風致如此然公內行修族黨無間言遇人不
以貴賤必謹延塾師課羣從若子必擇有名德者授館

必忠以恪雖古人避舍避黷之風不讓也公不喜事家
人生產業寢落

王師下江南歛以金文毅公聲襲據故兵燹尤甚公暇
輒摩挲山水間及老矣飲酒不輟竟卒公子五王選士
授司理植舉甲午鄉試正海州學豐王弟子員文王年
例入太學孫侯度舉戊午鄉試皆以文世其家

儲子曰公孫昌字寧蒼好文學今歲肄業予邑與予遊
予因得次公行事公夫人洪氏奉常桂渚公女雅嗜讀

書嘗夜燃官燭點茗與公對把卷盡一帙乃寢至今歛
人傳者以為道山廣都間人也蓋承平勝事盡矣然如
公風旨又何其脩遠也公女聘王氏封股愈姑病女孫
雲湘凌忠烈公冢婦死夫死事尤烈曾女孫字汪氏以
貞孝聞別傳不載具

太學洪公傳

洪嗣憲字子繇歙桂林人文衡明太常寺卿神光熹
三朝名臣嗣憲少工文補博士弟子七試鎖院不得志

乃應舊例籍胄學而研覈經籍彌力嗣憲性質直不設
城府好施姻黨艱厄解索伙佐至傾貲不少恡歛人士
談長者下拊指輒曰子繇先生歛南磨盤山達淞昌化
地界葉村老竹嶺多伏莽嗣憲亭其巔亭後菴之曰關
橋施田三百六十弓擇僧司其入伴行者寒而湯暑而
茗早暮而輿擔奔輳至今杭嚴諸郡之有事於歛者止
亭輒談子繇先生曰是於我有德嗣憲祭必謹殯必戚
過祠觀精藍必入肅拜過必下抑抑如也理諸務廩廩

如也曾祖福祖豪胥贈太常寺卿建坊桂林書曰三代奉常志典也及年五十屏制舉業間繙徑山雲棲諸錄愛巖龍洞嘗止洞之石室者匝朞暇則濯湯池搜龍唐禪師蹟蓋足不履郊郭達術者十有七年年六十六卒子中悅中懷中恪孫正治敏治胥注州長史曾孫肇懋籍真學肇模籍揚學

儲子曰昔漢魏間陳氏望於潁州繇實暨紀羣官甚貴而時人語曰公慚卿卿慚長桂林洪氏歛望也嗣憲集

居巖龍洞嗚呼可以無慚卿矣予傳其畧書而授肇懋肇模曰予言止此時也而尚考東林黨議癸巳辛亥京察諸顛末暨崇建玉芝宮顛末

野亭萬君傳

萬迅字叔翰世家邑九里高祖吉明桐廬訓導學者稱古齋先生曾祖士和嘉靖辛丑進士禮部尚書卒贈太子太保謚文恭再世以理學著祖曾父德憲胥高才生迅生而篤孝德憲卒奉母王居城東漕倉之浜昕暮出

入必告必面日侍寒煖飽飢唯謹王疾羣醫斂手泣劑
方以進立愈戚黨異之迅事兄弟謹撫弟嗣恭恪尤有
恩意嗣恭厄於怨家亟殫貲營護體雅豐皙輒至鰥瘠
家人胥泣下久而嗣恭之寃訖白恪序最幼假貸為買
屋一區母王時詣視忻如也奉二舅尤篤伯舅闔室來
止蓋俟以舉爨燎者且四十年迅內行修遇人謹甚不
少置辭辨而性雅騫朗賓友時來過從輒信宿留或淹
至浹歲懇欵彌甚西山楊先生燕侯邑高節士也老而

息之嗣亟歸婢先生獲弄孫焉迅幹局恢密經畫祠墓
不少佚畧建祖禰祠尤準禮嗜義勤施然諾不少爽家
不逮中人產逋質券山積而雅不冒沒人一錢婦孺胥
尊信之伯兄九子繼卒嫂病且棘三孫幼籍貲以屬綜
畫十餘年孤胥立而後返籍寸絲顆粟無漏焉戚屬某
嗜博妻鬱邑且卒封鑰奩具直累金數百屬迅室吳以
屬曰雅知公長者吾女幸長手畀之後數歲某聞亟來
索出篋笥封識具存迺愧拜謝去而訖不克守也洎卒

復為綜畫輸逋賦某子獲免纏繫戚黨大義之迅晚歸
九里文恭公書室也前卒一日拏舟往拜文恭祠卒之
日起居如平時晡倏命僕往市歛具僕愕胎却立怒掌
其頰復命姬滌簣蕪香訖少偃卧家人竊視業卒齒六
十有九子夔輔歲貢工詞翰臯元邑庠生先迅卒胥

贈翰林院檢討孫松齡試博學鴻辭第一入詞垣名譽焯著
椿齡入國子學克業迅業曾孫秋期籍監三禮館校書亦工文
儲子曰文恭公雅號端挺歷忤分宜華亭新鄭江陵諸

相至其督留都糧儲也嘗疏江西左參議黃正色立法
詳密糧無升合欠且平易近民宜徑擢參政再任又府
軍衛右衛後衛金吾後衛神策衛龍驤衛八倉宜省留
烏龍潭諸近水倉二十七而水兌耗米三斗宜量減五
升高砌灘場固基二尺築垣建殿屋以便堆積此胥考
索經籍之明驗世有訾姚江學為空寂荆川學為無成
者妄也迅少不漸應舉晚號野亭唯師古齋先生惇實
砥行用永延文恭世澤奕葉罔艾允克家良士哉

望京朱君傳

自徽國朱文公之教被於饒池歙以暨江左宋元詳載
儒學傳宋史又有孝義元史又有孝友傳迄初明而浦
江鄭氏彭城權氏尤著鄭氏自太和氏文融仲德氏濂
主義門家範它如元僉浙西道廉訪事深禮部郎濤明
福建左參議湜春坊左庶子濟禮部尚書沂蜀府長史
楷御史幹檢討棠大理少卿懋胥號顯秩而權仲常氏
謹拜文華殿大學士謹子文解倫倫子字三世胥以孝

旌

熙朝薄海同風士多淳行其克守鄭氏權氏之教而行
涉漢蘭陵王氏唐南山崔氏之資望者予嘗稔得於文
素朱君君名鎬字文素望京其號也其先籍歙之浯村
祖瑞石公徙予邑宜興父承德公拱壽母方太安人君
事親孝少窶而膳必腆父母固止之不少變父晚病消
渴食暨飲日胥數十君夜不闔睫凡六旬有奇而父卒
毀甚斂奠虞祔胥守司馬文正公家儀徽國文公家禮

而屏浮屠法不用昔權仲常氏母年九十而終躬負土
封樹廬墓三年闕廷出其事狀以示百僚君母亦年九
十有二君業踰六十省侍必準禮比母卒而哀號遂以
終其身忌日尤不忍聞此君克孝之實傳述於通達委
巷者也朱氏繇浯村徙邑西門傳故宅君特建宗祠而
制產以贍祀事雍正三年又命長君侍御世勲歸歛繕
浯村祖祠祔奕代主而胥鑱碑於家以識此又君闡祖
彌孝享之思倣唐人家廟禮而彌焜耀而昭垂之也君

伯允綜紀家枋資君讀書仲允逋券山積君胥克欣佐之比二允歿而命伯允子入六館試承宣司分仲兒子田盧胥克有立伯姊寡撫其二子如己子季叔二嗣胥祇為擇嗣婚且贍生業而復制產以贍其祀事君於邑西門歛浯村族胥為長收族廂祀胥協情禮族人待以爨且晉而籍南曹陟清要者數十年比君年八十有八卒復遺命入朱提三百兩以西門祠以贍族之不克斂殯娶嫁者蓋其敦友睦焉若此君少師子從祖在陸先

生工文藝偕主計部政吳公撫偏沅潘公上舍陳君子
從叔少白孟為二公暨伯兄素田胥號草堂高弟後吳
潘二公子伯兄隸仕籍而君裁用明經老晚而手不停
鈔小楷尤精整古文詞經義胥成帙嘗萃邑英彥於西
關里第月試義後多獲雋此又君闡草堂之教而其克
忠且敬者滋著也君外祖方公嗣久泯君慎擇方氏子
棠嗣婚且瞻生胥如二叔外舅徐公系名族而窶且盲
君時膳之後徐公孫泰工文早卒公嘗以朱提二十兩

屬子家轉子泰子迺克婚故子稔得其克媼者為詳君越壯歲而業差振洎侍御君成進士繇計部入南臺適孫桓復秩編修而君彌自斂飭當塗罕識其面端居簡出唯邑有利濟惠賑公務輒蹶然起首占捐貲藉康熙四十六年暨明年邑推君監賑故事散糜繇辰訖午君出困米鬻糜俾飢氓獲彌日就食雍正十二年甲寅監南社廠廠地犬牙錯溧陽金壇例不賑鄰邑君復多鬻糜活附南社邗聚氓邑北門外三里有巨橋館三邑漕

艘道西門古有福德橋縮西北鄉水陸道時胥圮君鳩
工增市堅牢石造之而二橋胥還舊觀君嗜施張氏售
資字田四十畝尋歿子窶甚君憐而折其券或詐售田
多至百畝有奇後寢露乞以屋暨子女償君檢還其券
蓋任恤事雅多類此乙卯秋九月以編修君入館獲與
覃恩貶封翰林院庶吉士君望

闕肅拜受

命而又以父之不獲列彝典也是夕夢父而雨泣尋以

侍御君終養

特恩貶贈父承德郎戶部主事母太安人異數存膺爰
克葳君少時勤肄書史之志而仲君世燾叔君世熙胥
銓注司馬偕侍御次君上舍綬胥工文諸孫曾孫胥號
慧敏然則鄭氏之世列清秩權氏之峻擢綸扉克守其
教而行陟漢蘭陵王氏唐山崔氏之資望以書於晉
紀暨徽國文公小學篇者予知歛浯邨邑西門之族姓
且彌勗之矣

贊曰昔鄭文融著家範三卷凡五十八則子欽增七十則從子鉉又增九十二則至仲舒氏濤與從弟泳澳湜啟兄濂源互相損益定為一百六十八則刊行焉而家範彌備予爰撰朱君傳附於鄭氏家範之後朱氏之始遷邑也世居福德橋西堦君又嘗殫力新是橋蓋會符千百禩嘉名云

蔣平川傳

平川先生系蔣氏名錫震字宜潛自號平川漁者故世

稱平川先生蔣氏繇陳左衛將軍來亟載諸史後析支
邑西南之澗橋故先生又號澗上丈人祖農師公父某
公母萬孺人先生年六歲嬉於門見宅兒謁師輒歸索
衣冠亟欲往家人憐其弱止之不可農師公訖從之後
游他塾見他兒誦綫裝書輒因請攜歸竊誦之尋益誦
莊騷文選間謨詩古文辭族祖韋人先生亟激賞之韋
人先生以詩雄一世者也晚號南山老樵先生嘗賦截
句曰太息吾家一老樵獨裁清識挂詩瓢泠泠秀骨春

蕪裏遙禮青山久寂寥手訂詩編千首有奇斲鏡版而
惜其工之不克歲也先生後遊予從祖在陸先生門在
陸手書曰垂老得一良友又不越鄉幸甚又曰意有所
到作為文章前後共得如千首吾子其次第編校定為
幾卷後先生賦詩曰太息侯芭成白首尚能長誦解嘲
篇自注曰時記及在陸師以遺文見屬事故及之今在
陸手書具在也先生性剛飲酒酣喜論事嘗語人曰人
多訾予狂妄惟九峰樓諸先生暨潘魯觀郁峻升曹協

華儲從彥諸先生初為布衣交訖無間蓋先生嘗讀書予家九峰樓前後凡五六年而業彌進此其種學績文聲振藝林之概畧也先生年三十有四籍於校出遂寧張公門三十有八雋承宣司試出韓城張公門四十有八雋禮部試成進士出安溪李公暨韓城張公門嘗游齊燕豫楚章江淮陰賦詩盈行橐歲戊戌年五十有七銓注知直隸之慶雲縣夏六月十有一日受事時苦旱十有二日遂大雨有喜雨呈僚友詩己亥六月飛蝗入

界輒殲有捕蝗謠庚子四月復旱禱雨輒應喜而有詩
時鹽司議浚無棣河檄亟下它邑莫敢言先生亟牒詳
曰遵查古河淤塞年月無可考縣志曰無棣河與鬲津
河合流經海豐境達於海唐刺史薛大鼎浚治之通魚
鹽之利繇此推之則古河淤塞其自宋元來黃河南徙
之時乎職單騎親勘縣境其地勢西南高而東北窪下
西南縮而東北袤土壤疏惡民無蓋藏若挑浚古河上
受樂陵之水則今日之按畝行糧者大半皆為澤國且

必平墳墓壞廬舍盡奪園廛利而日使之負土荷鍤非計之便也且河起自樂陵下繇鹽山海豐而達於海計地凡二百餘里當役民夫數十萬其費金錢當亦不翅十萬此地既絕非孔道又適迫輸輓何暇損數十萬金事此不急之務也語云利不十不變法今誠親見其害未見其利此前明楊旦張問達諸人屢上議而輒止者誠以形格勢禁而知其功之必不可成也事乃寢瀕海民始獲安枕然則薛刺史浚河雖載唐書而繇宋熙寧

河決曹村後地勢頓改雖明建安涇陽二冢宰殊不逮
先生詳議之懇懇也先生蒞縣雅崇文亟禮工文士檄
修城東南隅文星臺魁星樓庚子落成題日星雲漢四
字額是秋雋者四人爰舉古守令行鹿鳴宴禮書事以
贈曰中天瑞氣紫烟浮管領斯文擁上游才子乘閒來
作賦明星靜處獨當樓登臺想像河流轉坐嘯遙看海
色秋傳語諸君須記憶繇來此地是瀛洲邑工詩者競
和之選士馮雲生有蘓李風流人倚樓射雕寶馬亂嘶

秋句時傳勝事又修名宦祠手書木主鑿石表古延陵
臺書碑側曰慶雲縣西南八里許土阜巋然可徑畝俗
名高墓臺按郡志云慶雲有古延陵臺蓋慶雲之東為
羸西為博此所謂羸博之間也夫季子之始封廣輪揜
坎其高可隱而今乃巋然若是無亦後之慕季子者歲
時增築以逮此與然春秋迄今凡二千一百年有奇雖
臺址尚存而鄉民已別構玉皇廟於其上自茲以往歲
月遷流或再經建置臺遂湮沒即後有好古君子孰從

而求之爰是伐石表署以貽千百禩之同志君子此亦
導民禮讓之曠舉也先生政懲頽廢俗好演劇嚴禁之
焚碧霞祠劇本事傳河朔條教多寓鉏強扶弱指而特
設慎刑簿書杖數以時觀省先生政恒最諸邑而雅不
善事上官尤與守不相中事多受箝束鬱鬱不得志賦
詩曰舊與高人約耦耕乍嬰塵網負初盟只今脫幘須
投地倔強安能更屈卿迺以壬寅秋七月歸里嘗書曰
三年縣令清慎自勵訟簡政平不趨勢利君子未必怒

小人未必喜無德可當歌有過還須記流泉自波虛舟
不繫卑官薄宦如斯而已歸而成澗橋八咏工詩者多
和之哀為一集此其蒞官之概畧也先生少孤憤克成
農師公志歸讓小宗譜三卷特設宗幹執爵而侑諸祠
賦詩曰今朝一尊酒敬為祖宗斟聯宗耆五老會月一
舉尊命子汝誠賦詩曰若比睢陽成故事澗橋也作畫
圖傳樂安宗多和之先生性質儉嘗著六簋銘曰東坡
有言儉以養福早晚所需一爵一肉客至則三意謂已

足倘曰豪舉匪饕口腹廣迺倍之聊以適俗竒園圍三
偶二則六止而不過以節嗜慾銘諸座右用代更僕雅
素士多遵用之先生既擅詩宗尤嗜揚摧時偕遠近文
士劇談予季弟汜雲黃君隆吉謝君皆人周子東標號
詩友善誨後進業多成如予族弟僉粵西駟鹽事于賓
承宣乙榜戴君其輔其雋者也先生詩嗜劉賓客夢得
元左司裕之探其奧非捫揣籥燭者比文多竒氣嘗
饒青溪詩十卷青溪文藁一卷登嶽謠一卷大蘆寺源

流考一卷先生歸田十有八載詩古文詞滋倍又易說一卷中州志一卷韋絃錄論書偶鈔詩話雜錄暑臆雜錄見聞日記困學自得鈔會心劄記胥埃鏡先生配濮孺人繼周孺人生汝誠予前銘所謂一子橋者也繼吳孺人汝誠國子監生庭誨嚴而有法孫慶業慧業廣業大業先生有弄孫戲作諸詩歲己未年七十有八秋九月十有九日羣從壽覽揆辰賦詩曰菊秀蘭衰鴻雁哀杜陵締絡且悠哉虛言往日充閭慶多事諸公載酒來

生我勞勞成逝水百年踽踽怯登臺醉餘笑把花枝問
爾後逢迎得幾回越冬十月初寢疾八日微嗽酒而卒
蓋汝誠狀行畧者若此而先生嘗自傳平川漁者曰平
川漁者長於農家生不治漁事而嬉以自目從所好也
方受書時質甚魯十數過不能成誦父師厭苦之然畧
能強記又意殊自好負氣不能下人早歲孤露家居村
僻無學者聞見狹陋漁者心薄俗師訓詁迺猖狂恣睢
博採子史莊騷及方外無生之說意甚樂之遂參洞宗

呼崖和尚於儒晚師在陸先生間為詩歌古文意有所
寓引腕從之時亦作詼嘲涵謾語然於詩歌古文於道
皆無所得也性忼爽喜劇飲縱論往往抵掌天下事然
疎脫又苦卞急每廣座中言語襍亂意有所不可者即
拍肩相向若不巳即以他事謾罵之或遽自引去一時
羣謀以為狂或指為妄甚者造作言語目為恠民然皆
不得其實也漁者既與俗不相中自雅遊數子外則喜
獨遊春秋佳日每獨往數里盤桓水石間日暮忘返嘗

獨經董山下聞其上有孫皓圜碑時日已沒景秋風振
林木攝衣步山椒而觀焉用夜半抵舍則馳二十里矣
年四十餘困於貧賤棲破屋數椽食常不充然偉貌修
幹衣縵敞昂然掉臂落落往來人間人熟視之若無覩
也漁者不以屑意後忽憤惋若中風狂走狀人莫喻其
意者或問之不答而漁者亦自此困矣悲夫是固其所
少哉抑其中真有不克者邗平居喜飲酒然不能過
二升後益頓減其獨醉無聊即高吟古漁父詞曰相中

老人讀黃老手按紫蘭坐碧草春至不知湘水深日暮
忘却巴陵道吟已輒大笑此壬午病中懣鬱瑰怪之辭
故跋曰異日需吾橘兒之成而示之其清狂實不至此
然其文則水田月生不能越也歲乙卯卜吉於安山之
南翔迴山復自謨平川漁者墓誌且系以銘此又陶淵
明王無功司空表聖懣懣遼曼之跡而志之以武文冢
銘者也

贊曰當先生遊章江時予賦詩曰直北軍書裁木葉征

南幕府亦荷花人談劉表劉琨久我愛山濤山簡家蓋
靳建參省僉院勲以武明前後七子之階秩也而才訖
不克展惜哉先生愛舍南小邱名青邱有獨遊青邱詩
邱側小園名南園有南園春興詩青邱近古無棣而先
生抑未始不熟蘓之南園考杭之南園記也晚歸農師
公遺屋不羨一弓地而築悠然樓五楹蓋志淵明悠然
見南山句也今九子蒙芙蓉盈望而先生不可見矣予
他日尚一陟樓望之

文學吳伊蒿傳

伊蒿吳君名宗字企儒高祖光祿寺署丞達德曾祖乙卯文解鄒襄兵備僉事正己祖丙子文解司溧陽諭遂父茂才清原母予從祖在陸先生女弟也吳氏江左名族世以文行著予嘗偕企儒兄右丞冲扶肄業於在陸先生冲扶才最高視萬物藐然無足當其意談辯如決河右丞亦刻意西江大士而企儒時來省兄雅敦默客與之言時不對予從叔孟為公嘗推中表諸賢或曰冲

扶傲甚公獨曰企儒傲者也既而邑顯者腆貲者企儒
齒寔長經歲不少趾其門然則企儒誠傲者也企儒事
茂才公暨予祖姑尤克養志茂才公晚而目眚企儒即
昆季六賓主環疊祖姑亦時出醴餌賜之樂飲浹旬有
奇者歲凡六七舉茂才公嗜卉石尤嗜延建蘭卉發時
時召學胥邵至賢清歌俾僮俞仲和之至於褻衲離襪
之際未嘗不叩几稱善而遂以忘其目之眚也比嗣丁
內外艱企儒痛甚而自署其號曰伊蒿非蒿也夫不翅

我也吾聞愛親者因以及人之親而并以及人之長然則企儒雅非傲者也企儒性褻直嗜施析產獨主其贏瘠繕小宗祠首飲佐朱提迺克歲羣從繫夏一葛而質之迺解既而聞市女而戶纔一僮而亟市之也女迺克歸其室既而復有市女者亦如之友假璣珥而遺質券曰是奚害宗叔寒而解衣衣之曰某偕四子均服也畜保母子之瞽者而訖浹八旬也宗嗣舉宗正而朱提以兩計者至美三十有奇建議曰祠田序司之不如其公

司之也而祠遂以滋飭曲直率立剖雖克軒輕人者不
少避或籠公利以肥其橐建議公司之至涉訟獲直迺
止宗女字匪人將汚之女不從訟之亟辯之疆而女亦
訖克歸其室僕訟主而以厚賂撈笞之犇訴外臺決二
載訖克底僕理而僕遂疲於奔命以死也夫企儒之夫
決焉以必信其志者繇有氣岸以激之也蓋傲析二義
驕則德凶簡則格峻書曰簡而無傲企儒簡者也非傲
者也而予并謂維傲奚傷惟冲扶克傲此則傲客傲吏

之說也。企儒好讀書，尤熟濂洛遺書，擊壤集少工經義。在陸先生嘗推曰：簡而克蘊，古質籍於校，補增廣生卒。年七十有五子一鳳，其濤之碩一鵠，振鷺一鳳，其濤籍於校。

贊曰：顧端文公有言：君子須常常吃虧，纔做得高。忠憲公著吃虧吟，企儒合而跋之，以代遺訓焉。夫臨潼廷議端文公嘗遺葉福清孫富平書，西江彭躬菴先生序祝工科奏疏識論，又別蓋敦行，撝謙受益之義而克殫之。

者如此其難也企儒淹高才生而風裁峻整業見梗概
然實絲吃虧一語基之矣

湛斯曹子傳

琅玕曹子在豐字湛斯五世祖明南京工部尚書三暘
高祖福建布政司使司勳曾祖太常寺典簿福孫祖高
才生茂勤朝宗侯氏所銘曹秀才者也父

國朝貢舉族銓司訓亮武其年陳氏嘗昕夕駢吟而文
友董氏遺書極論文史儀象者也湛斯少沈默不逐曹

輩嬉遊日坐杲亭作行草暨題署大字蓋百年來書法
尊陽曲青主傅氏為第一江南北則高江上笄氏義門
何氏青主先生風節逾古高士江上按西江嘗忤執政
義門亦亟書一為文人語此柳誠懸心正筆正所以為
不可漸滅之論湛斯書獨嗜森瘦端勁蘄上宗漢扶風
曹世叔曰必如此迺為有骨而其他姿媚肥膩暨黃魯
直所誚弄筆旋統自稱草書者雅不屑也湛斯家差饒
洎年寢長而業什八九落整宗祠釐譜系其居邑里也

振殍收嬰瘞骸涵卵胥彈力經畫之至年七十有六不
少倦蓋澠池月川先生夜行燭安邑真予先生會講諸
規則號近世曹氏純儒湛斯實克敦行之而越雋梓潼
之陰騭豫章旌陽之淨明抑匪類崇奉道術者之清齋
謚靖潔貌而溷中也乾隆元年

詔舉賢良邑里書湛斯行上之庠校庠校上之邑邑上
之郡郡上之承宣司承宣司上之制撫胥覈允埃予冠
帶而湛斯遽卒然異乎世之尠其實而被此名以賈榮

者遠矣湛斯嘗籍六館銓注州同知其舉賢良節孝也
以乾隆二年子澤咸壬子舉於鄉淳咸胥克世其範

孔節婦傳

漢光祿大夫劉向序古列女傳曰宋人女嫁於蔡而夫
有惡疾其母將改嫁之女曰禮一與之醮終身不改且
芣芣草雖惡猶始將采之終懷顧之况夫婦乎乃賦芣
芣詩而訖不去高淳孔節婦者溧水沈氏通判守墨之
女孫也孔氏闕里系漆橋秀山析支路西四川行都司

使經歷貞言重守墨族望為孫衍岳歲禮聘而衍岳股
折孔氏辭婚節婦屹不可保姆暨家人胥勸之艱然變
色曰我死終作孔氏鬼若何得妄言守墨重違其志年
二十有五歸衍岳婦道甚備產一女而衍岳疾劇蓋嫁
之又二年年二十有七而衍岳卒訖稱孔氏未亡人者
五十有九年年八十有五康熙二十有一年三月無疾
而卒此其視茱萸之女既嫁而夫惡疾訖不聽母勸去
歸者志尤犖確也傳曰陳寡孝婦夫卒養姑不衰恒紡

績以為業其家哀而將嫁之孝婦曰妾離襁褓受嚴命而事夫夫不幸先死不得盡為人子之禮今又使妾去莫養夫老母是棄夫託而著妾之不孝也訖養姑二十有八年姑卒葬祭具當衍岳之疾劇而卒也祖貞言年六十有七嘗四娶史王徐汪而汪孺人倚父尚來母史孺人羸疾環泣節婦哀慟寢絕二孺人泣挽而目乳保手幼女曰若死四老人胥不得生且若呱呱者何節婦聞之復慟絕少甦強釐喪紀間治醴茗晉堂上貞言為

加一餐節婦枋家手紡績日掃墮葉益薪煮野蔬雜澹
糜噉之而供膳必腆必潔無何尚來卒二孺人嗣卒貞
言年八十訖前丁丑卒治四喪胥無訾禮松楸列植而
守墨暨妻復卒歸飲窻窻如禮迄今高淳溧水人士過
兩家墓道輒指歎曰參闔孔公賴有孫婦既而曰不寧
唯是蓋別駕沈公寶克有女孫也其為二邑崇企若此
此其視陳寡孝婦之養姑不衰而不克逮舅暨夫祖若
祖母者其艱易倍徙何如也傳載魯寡陶嬰紡績為產

養幼孤而頌圖亦曰陶嬰少寡紡績養子傳載梁寡高
行援鏡對梁相妾所以不死者不忍幼弱之重孤也又
曰魏芒慈母率導八子咸為魏大夫卿士成於禮義當
節婦之慟寢絕也聲息裁屬亟語續祀貞言命嗣衍岳
從弟子興曾竒愛之旋殤又嗣衍岳從兄子興贊勤撫
婉誨長為娶趙氏婦旋疾夭族姻胥愆恒無敢議予嗣
事久之迺擇毓慶嗣興贊幹畧開敏闢路西聚落節婦
受養十餘年而卒毓慶年亦至八十復擇嗣今學錄傳

煜識鑒彌焯生繼先繼光繼允胥工文標春明金馬之
望繼先令籍於校初節婦產女歸知州邢振岳嘗就養
陽曲署數年而歸甥某雋選貢然則節婦之紡績為產
雅類魯陶嬰陳孝婦以克葦梁高行不忍幼弱重孤之
指而路西緒業訖偕漆橋秀山埒又克推其餘以暨婿
若甥則雖魏芒慈母之八子卿大夫士於魏者不翅也
蓋陳寡孝婦淮陽太守以行聞漢孝文高其義貴其信
使使者賜黃金四十斤復終身號曰孝婦梁高行亦復

終身而宅若母師女宗義繼母義姑姊之屬率多賜金
錫號節婦苦節業書高淳縣志雍正元年

恩詔覃訪節孝庠校士暨族鄰上之縣若學縣上之府
府上之承宣司以上制撫學三院彙題獲

允旌給銀三十兩建坊傳煜鳩工琢山石崇閎絢碧艾
稚環觀胥泣下又歲春秋列祀節孝祠嫩行殊典焜耀
閭里且不啻書漢劉向序傳予少識邢君而肄業史崧
今授繼先繼光經述節婦行差覈感概謨傳以續續列

女傳後

頌曰維孔節婦言生瀨水聞夫廢疾肅誦芣苢于歸夫
卒貞守歿齒是用序鑒寰海女子

史節婦傳

節婦蔣氏邑西餘文學如紉女年十有九歸義莊史可
端產子福馨財七月可端疾卒時節婦年二十有八慟
絕始蘓營斂剪髮寘諸匱代殉也既而舅復卒殯胥如
禮西餘義莊號世族嫻戚多饒貲而節婦夫暨舅疊喪

無以為生或勸盍改圖峻拒之會有惡少年偕族戚髦
蒙者斬用術鉤致聚謀毀屋節婦慟曰是脇我賣身也
吾頸可斷身決不可賣避旁草舍昕夕懷淬刀綴衣匝
百結者決月既而父復來勸且曰守有五難節婦泣曰
兒決守奚問難易且人胥為其易誰當任其難兒志業
決縱有什伯倍苦難於此者兒且不避父語塞衆喙迺
息節婦雅嗜勤勩率用十指易升合米針紉無虛晷爨
或淹再宿嘗暴水烈日中竣其熱迺沃諸釜舍旁隙地

羸畝瓦礫山積躬闢之指亟裂不輟壤出樹桑植麻瓠
又藝菽可端墓側羸半畝日往芸治洎福馨長擇室食
粗給而逋賦亦寔以無擾焉節婦性介挺義有不可必
達其意嘗乏食或饋米羸斗峻却之歲大水飢甚會里
人獲鷺羣呼衆往食亟叱福馨無敢往後失鷺者來怒
詈衆迺愧服鄰女遺釵匝再時間檢獲遽命福馨還之
曰道不拾遺士節也節婦壺誨尤肅福馨學業寔有聞
補博士弟子號高才生康熙癸酉郡邑舉節烈丙子巡

撫高邱宋公提督學政遂寧張文端公彙題

旌表丁丑十有二月二十日

詔給銀三十兩建坊邑里聚觀胥歎企苦節泣多數行
直下焉節婦歸史氏蓋稱未亡人者五十有二年年七
十有九疾亟整衣強起夕迺寢有斬啟手暨足診視者
堅不許旋卒其始終秉禮飭躬嚴厲若此

儲子曰福馨營建坊訖閱一載疾卒節婦復慟絕始蘓
既而曰曩遺七月兒今遺十歲孫是未亡人終不了史

氏家事也迺復強治凌稜務勤誨孤孫正貽而正貽亦
訖克有立聞者尤歎企之當高丘遂寧兩公之彙題也
闔郡首海烈婦次節婦夫烈婦慷慨而節婦從容嗚呼
胥宜書古列女傳哉

江氏節婦汪太安人傳

節婦汪氏敏文學汪文葵女母方孺人節婦少善事父
母年十六歸封儒林郎江澂江村族望海內澂曾祖光
祿署丞應全祖尚寶卿日照徙儀真父九萬籍胄學澂

少警敏與弟閏胥以文名江淮間節婦事舅暨姑黃孺人謹甚佐澂以禮進止必恪生一女四歲而澂疾卒慟且擗斬以死殉時年二十有七矣先是澂叔九臯卒叔母程守一室雅善節婦來勸曰而今幸有身若產得男是而夫不死也吾室殊肅謚而願與吾偕處乎姒媪勉如程指姑復泣諭之節婦慟受命遷止程室越月婉程遽問曰男邪媪徐曰女也節婦涕淚直下程曰無庸媪善視兒媪不言既而曰死矣節婦慟絕久之蘓肅程藁

席前曰婦遠父母幸母事姑暨叔姑而天不降祐夫業
亡產不男而又不育曾不如叔姑有子可竢婦今自此
訣不復能事叔姑矣乃手女屬程曰是未知異日幸卒
能成長否惟叔姑善視之程曰而夫之兄幸有子而舅
姑行議嗣是而無子而有子也且而女殊慧奚忍委之
偕姑暨媪婢譬說萬端節婦慟而止肅告舅姑嗣激兄
源于世棟勤護之課肄有節旦夕理絲枲誨女女工筭
歸瑞州守程塤世棟工文多長者遊籍邑校又以勞銓

注州長史節婦封太安人偕程受

詔旌給銀建坊世所傳江氏雙節同止一室二十年者
也孫旻旻暉山永普昱恂胥好學旻舉於鄉暉山永昱
恂籍郡邑校曾孫四節婦年八十八卒蓋稱江氏未亡
人者六十有二年

儲子曰予讀雙節錄贈言殊富今拔其大指著於篇黃
岡杜氏謂忠臣節婦胥有成事死事之分華陰王氏謂
下宮之難杵臼為烈而存孤卒賴程嬰三原孫氏詩亦

曰寧難勿為易予謂死事成事異轍同揆節婦之成世
棟也類嬰其斬以死殉而不復弱女是恤也蓋類杵臼
或曰節婦不止程室且決為杵臼而不為嬰是程亦節
婦之嬰也

楊氏金烈婦傳

藝文志女訓類其傳列女者劉氏皇甫氏尤焯著綦母
氏劉氏次之項氏又有後傳魏氏又有傳畧而出於閨
閣者趙母有七卷垂拱時有百卷其為之注釋暨頌讚

者劉子駿曹子建皆有頌而出於閨閣者曹大家有劉
向傳注孫夫人有序讚一卷若其列編史籍而不名傳
者自諸葛孔明貞潔記杜元凱列女記外竹素尤繁至
女誠內訓諸書暨出於崇文總目尤氏書目後者殆不
可殫紀也蓋其叙節烈綦詳矣然而書不食卒者差尠
其啗土飲水終日不食者或不必書卒而不食旬日卒
不食三日卒者又或有所振激而為之此有以徵慷慨
殺身從容就義之難易雅相逕庭也休寧烈婦金孺人

汪溪世族父正侃字亦衡雅敦耆宿望母江孺人嫻禮

則孺人少事父母孝事兄恪

啟曰擬敬姊以敬兄

族黨胥賢之雍

正二年甲辰年十有八歸芳溪楊氏子恂恂字某少嗜

學夜誦漏率下二十刻有奇孺人用牙刀玉尺伴之

呈曰

牙刀玉尺深宵佐讀

甫六月恂漸繇九峯三泐間彌擴所聞迺擔

簞遊松江府而遽以疾卒於邸舍孺人聞之慟寢絕少

蘓水漿不入口者累日

行實云爾

恂祖母某孺人暨舅某姑

某孺人力敦勸不少易復請孺人母江孺人至芳溪偕

敦勸迺少進粥一溢米起恪供婦職而支骨且羸削如
綫矣江孺人懼其志之訖不可少易也迺挈歸汪溪寢
食必偕比恂匱歸芳溪孺人望見慟復寢絕而以恂窀

窆之有事於卜且嗣子議不克定也復起視舅姑膳

曰啟

露棺迨逝靡穴與同瓊樹飄零無枝克紹又曰祇載晨
昏用觀後事呈曰脫簪珥而孝養靡荒此胥善言賢婦
學識或曰婦人美學儲子

曰雖曰未學吾必謂之學矣

比藏恂葬舅定嗣子議孺

人少間雍正六年戊申夏五月江孺人疾卒孺人慟曰
未亡人宜早殞今母復不祿尚奚戀是月杪遂不食肅

衣袂拜堂下曰婦不克訖侍養永獲罪謫矣舅某姑某孺人泣止之家人胥環泣而孺人訖不食粒米五日卒年裁二十有二時蓋六月三日也環芳溪數十里荒巒迅湍廬聚蹊渡胥驚傳楊烈婦焉噫夫婦之事夫猶臣事君繫邃古以來惟孤竹公允公達氏以餓書於經正平屈氏號極忠嘗著辭曰朝飲木蘭之墜露夕餐秋菊之落英可謂至潔而其擬象上征暨覽四荒也距投汨羅一間且猶抽瓊枝為飴瓊廡為棖之思今芳溪金孺

人迺克履公允公達氏遺風而了無振觸其從容就義
若此此則彌有光於列女傳而抑以喟宋景氏招魂大
招收氏七發暨近世食譜諸編之胥可泯闕也芳溪族
黨暨休寧膠校士聞於縣府司院入彙題或疑例不符
而國家敦勵風化獲

特俞旌給銀三十兩建坊并崇祀節烈祠環芳溪數十
里髻男鬢女來觀烏頭綽楔制胥泣下馬

贊曰從容就義實本慷慨孟子論舍生取義而以魚熊

掌喻之夫舍生則慷慨之指也漢邠卿趙氏注曰熊掌以喻義魚以喻生宋孫待制疏曰魚在水熊蹠在山二者不可兼得然則金孺人之五日決不食而徑以死報楊氏子也蓋芳溪汪溪且胥得熊掌矣鯨鯢鯉奚為哉

余烈婦黃氏傳

繇劉中壘後傳列女者衆矣繇陳思王後頌列女者滋衆矣迺若之死矢靡他而為節婦又或實克之死而為

烈婦則青陵臺華山畿迄今猶競傳之是故建祠表里
奕代彞典不得用刳股例比以銷善萌而即歸熙甫之
論烈女亦所謂仁義之甫爾槩芽而逆鏟之也吾比于
邑得烈婦一人焉曰余紫山妻黃氏烈婦父文顯母汪
氏家邑北門外姓貞靜居姑姊側無哆口語無露齷笑
孝父母日侍母晝刺繡夜紡布績縷率以為常父卒慟
毀誓茹素沒齒以報迄嫁不少變余氏江左儒素族聞
助甫登原之風而興烈婦筭歸紫山紫山肄業尤勤勸

烈婦逸盡斥金翠操井臼率夜分不寢紫山讀書勸輒
調茗餌進之歲乙卯遊學于杭杭余氏祖籍也時學政
帥公蒞試招覆名第一會廉膳索賄不獲力攻之用冒
籍黜後帥公稔其顛末怒詈廉膳業不逮而紫山繇此
寢病矣余氏江左儒素族也紫山歸讀書彌勤庚申八
月寢病決旬劇手藥甌泣語烈婦曰吾死矣偕若無嗣
輒咽不克語烈婦淚直下亦咽而不克以語也直誓曰
皆死紫山重頷之九月病革復申前誓已訣十有一日

紫山卒烈婦慟絕復少甦尸舉業加襚猶埃舍復慟申前誓乃受含馬殮訖烈婦爾拜姑曰媳有當死者三夫死無子一也舅姑有宗子宗婦諸子諸婦奚患侍養缺人媳祇以未亡之身貽大人憂二也夫存日嘗有遺言今遽忘之恐長逝者魂魄啣恨無窮三也姑泣慰止之母力勸且密護焉烈婦迺強進一餐俾不疑而潛埋篋篋刀尺胥有紀冬十月八日母歸潛易浣衣加麻練經闔戶自經卒時年三十有五面如生里黨婦穉兢傳之

胥為泣下

贊曰黃烈婦暨余紫山獨解大義非所謂纏綿病訣絕書也夫由范氏後漢書後奕代胥有紀載明實錄郡邑志所書且萬人有奇而蘄如烈婦之峻絕崖壁從容徇義者尠矣予爰為之傳以垂邑乘且以正封版例比之說

韓室王孺人傳

不見長洲續古韓子十有三年矣戊午秋杪孳舟謁子


畫山樓寒暄語訖手悼亡詩九章且書王孺人行畧曰
孺人大興榮祿大夫海州遊擊王公女孫榆林參議公
女母海鹽陳恭人少靜懋六歲陳恭人卒號慟不少輟
事祖母李太恭人繼母顧恭人胥婉恪顧恭人亦鞠愛
如腹出女也雅嗜書兄精膳主事君貽荃少肄經史弟
州同知貽蕙入家塾斂容拱聽肅如也先君子紫微公
緒大宗伯公家學而參議公亦肄業於常熟之蘇苞九
先生稔知才望廼命曾歲庚寅婚孺人於淮陽之署復

移常熟糧使者署過謁紫微公先母王安人家人甚宜
之既而曾偕孺人侍李太恭人旋北而聞祖母李夫人
不祿孺人雨泣以素衣訖厥喪參議公尋北旋而窆已
亥顧恭人卒孺人號慟如喪陳恭人癸卯曾偕孺人南
歸而遽聞參議公卒孺人號慟不少輟以素服訖厥喪
諫參議公陳顧二恭人神位於寢室朔望輒泣拜丙午
曾幸雋承宣司式孺人恨參議公之不及見也紫微公
王安人寢衰疾孺人夜率不閉睫乙酉紫微公不祿再

沈月王安人既不祿孺人胥號慟不少輟莫殯虞祥胥
襄曾長嫂哀諸禮洎歲乙卯聞李太恭人卒孺人號慟
不少輟增設神位於寢室而泣歎久病不克愈不識復
獲拜幾時也迨今歲五月十有三日紫微公忌孺人拜
訖喀血不復止八月二十有七日王安人忌孺人力疾
拜訖彌劇而病遂以大轉也精膳君州司馬君在遠孺
人感憶不輟一再南遊獲展喜甚而別輒泣不輟今歲
九月二十有九日孺人病業革家人璣侍問有何言哉

微聲曰兄弟遠而目遂以瞑也距生癸酉蓋年四十有六矣孺人誨子尤肅長佩祥增廣生次習祥皆祥胥嗜學長女日誨歸張啟元籍於六館己酉文解師良君子也次女幼女胥就傅次女字慕某宮保公天顏曾孫也孺人斥釋氏尤力蓋男子中之難得者其行畧如此而悼亡詩又曰補成一色天然巧十指酸時幾斷腸又曰整束舊藏亡散帙繕完牘馥蠹餘英此尤足以徵女工縫紉之勤而嗜典籍尤摯勤不翅冠紳士也爰書其語

而謨傳焉榮祿公名乾參議公名英謀太宗伯公名莖
紫微公名孝嗣胥有聞於海內者也



存研樓文集卷十三